

四庫全書

史部

欽定四庫全書

欽定平定臺灣紀畧卷二十

六月初三日

巳亥

常青奏言賊匪來去無常自四月

二十五二十九等日經官兵殺散之後又於五月

初三日糾衆來攻城外各營盤經

臣

派撥將弁帶

兵截殺鎗砲打死賊三百餘人奪獲鎗刀器械二

十餘件弁兵傷亡者查明賞卹初十日差探距府

二十里內外之鯽魚潭南潭中洲虎尾寮等處俱

各有賊二三千分踞要路並據前已投誠之莊錫
舍差人密稟臺灣道府賊首莊大田帶領番婦女
軍師人等亦同在衆賊屯聚南潭之內可以協力
擒拏臣即於十一日黎明親自統率將弁帶領粵
省兵二千名飛速前往剿捕賊衆未及準備俱各
驚竄官兵向前冲擊鎗砲打死賊匪并殺死共五
六百人奪獲賊械三十餘件其時莊錫舍亦帶同
義民與官軍內外應合當即生擒番婦金娘賊犯

林紅二名其番婦現有顯神助戰旗號且以符咒
蠱惑匪類以及隨同打仗之林紅因姦勾結俱應
與已獲訊實之賊目王坑郎楊章二犯一併解京
臣約計叅贊恒瑞藍元枚及駐防滿兵早已登舟
自因守候風信尚俱未到臣惟有先將近府賊巢
逐一殲除俟恒瑞等一到即親統大兵自南而北
沿途一有擒獲即隨時奏報再理番同知黃嘉訓
將砍殺王芬之義民陳秀成及在場証見人等同

王芬首級解送前來臣等詳訊陳秀成供認明確
且有擒獲王芬之鄭岱及在場之蔡運世等願具
並無假冒甘結反覆究詰似無疑義至前許投誠
之莊錫舍自三月二十七日隨同官兵隊伍殺賊
後即前往鳳山之鹽水埔莊意欲截賊歸路即將
莊大田擒獻因人少不能見功又設計令人在賊
中偵探信息至五月初三日莊大田來政府敗退
仍將賊衆分踞南潭中洲等處莊錫舍探知一面

差人密稟道府一面密約義民等伏於賊隊之後
十一日官軍進攻南潭賊匪大敗深以未獲莊大
田為恨臣看其雖係投誠之人將來或尚有可用
之處是以姑令暫留軍前聽候差遣再王坑郎楊
章番婦金娘并林紅等犯臣提齊研訊緣番婦金
娘平日以符咒治病騙人錢財適值南路逆匪莊
大田等攻擾鳳山即欲假其邪說蠱惑匪衆因以
番婦為軍師稱做仙姑而番婦亦遂每次打仗執

劍念咒作此鬼蜮伎倆欺弄鄉愚并受林奕文一品夫人偽札林紅前認番婦為姊後與通姦并學其畫符治病是以打仗時跟隨番婦輪邊幫護至王坑即係王坑郎向充鳳山縣糧差後改皂役又名王璉莊大田要他向各殷戶派銀許做副元帥又領有賊旂管辦運糧楊章一犯係賊黨許尚招入天地會給與小旂令其管隊許事成封為元帥該犯因此屢與官兵打仗逐加究詰各供認不諱

現將該犯等押赴泉州交督臣李侍堯另委妥員解京各犯家屬財產分飭各該地方官照例查辦並將搜出番婦經本偽札另封呈

覽奏入

上命軍機大臣傳諭常青李侍堯藍元枚曰莊錫舍自投誠後屢次隨同官兵打仗殺賊茲聞莊大田帶領番婦等屯聚南潭即密行稟報並自帶義民與官軍內外應合當將番婦及賊犯林紅擒獻甚屬出力可

嘉莊錫舍著即賞給守備並著常青面加曉諭獎勵俾
莊錫舍益知感奮力圖自効閱賊首林奕文所給番
婦札內有到府城相會之語是其意實欲窺伺府城
特因大里杙庄係其巢穴與諸羅相近林奕文惟恐
遠離該處為柴大紀所乘是以尚在諸羅一帶滋擾
而莊大田屯聚南潭等處糾集夥黨分踞要路其意
則專在窺伺府城此時若能先將莊大田擒獲則南
路賊匪自可以次廓清現在常青於粵兵到齊後帶

領出城剽捕即連得勝仗已覺壁壘一新聲威壯盛
恒瑞所帶駐防滿兵及藍元枚所帶浙兵一得順風
自即可過渡常青於恒瑞等到後即可會同統領大
兵前赴南路逐一殲除乘勝疾趨一舉蕺事至大里
杙為賊首巢穴前據林小文供稱該處庄內以大毛
竹為牆垣牆外有溪水環遶等語已降旨令常青於
進搗賊巢時用火攻為上策所需砲位如不敷用即
在該處鑄造亦無不可所需火藥並著常青咨會李

侍堯如數迅速運往寬裕接濟再朕批閱藍鼎元所著平臺紀畧藍廷珍進攻鹿耳門收復郡城不過七日而其餘黨竄逃各處乘間竊發輟轉搜捕幾及二年始能辦理完結將來常青藍元枚南北兩路進兵攻剿擒獲首逆林爽文莊大田等自應解京盡法處治其被賊協從隨同附和之村莊百姓應先行曉諭令其速行改悔棄械歸農即貸其一死各為安分良民以解散其黨羽至賊目及天地會匪自知罪在

不赦一見首逆被擒勢必紛紛竄入內山希圖苟延
殘喘及大兵撤後又復勾結滋事將來辦理轉為棘
手常青等於攻剽時務須嚴密圍堵如可設法招撫
者不妨權宜招致並曉諭生番如有竄入該境者即
時縛獻賞以花紅布疋如此辦理俾賊匪餘孽無所
逃竄庶可淨絕根株若任其潛匿稽誅又如從前辦
理朱一貴稽延日久更屬不成事體著常青務須相
機妥辦以期一勞永逸

上又諭內閣曰臺灣林爽文等滋事不法將民庄燒劫
隨即逼令附從以致農不歸耕商難復業屢經降旨
諭令常青等惟將渠魁首逆及實在黨惡不法者皆
應殲戮無遺其被賊迫脅出於無奈聽從者准其悔
罪自新以解散賊黨常青不妨整齊兵力前往攻剿
之先即將此意通行出示曉諭使被脅民人及從賊
夥黨一經悔罪棄械投誠即可歸農各安耕種不但
可免從逆死罪而且及時耕獲仍得口食自給贍養

身家實屬一舉兩得且伊等亦知賊匪勢日窮蹙旦暮
必就殲擒起此時通行曉諭將脅從賊衆安撫歸農既
可解散賊黨而現在節屆大暑臺灣本係產米之區
每年三熟尚可趕種兩熟於軍糈民食均有裨益至
臺灣地方經此次賊匪滋擾所有百姓田廬產業被
其蹂躪刦掠及遷徙失業者諒必不少現在恢復各
處村庄及未被賊侵擾業經插蒔佈種者尚有若
干處所並著常青查明迅速覆奏以慰屋念民依

至意

臣等謹案林爽文謀逆到處焚劫村莊小民貲產已絕不能自存無奈偷生從賊而一經從賊自知罪在不赦遂堅於附和蟻聚日多我

皇上周知民隱深原其被脅之由

異命屢申凡從賊夥黨一經棄械投誠即可免罪並得及時歸農安業養贍身家猶慮陷賊者無由盡知復

命通行出示曉諭以開其悔罪自新之路厥後各庄投
出者紛紛不絕足徵好生之德協于民心而格外
矜全真無所不至矣

初五日

辛丑

李侍堯奏言將軍恒瑞提

臣

藍元枚等

所帶滿兵浙兵於十四日得有順風俱即揚帆飛
渡其巴圖魯侍衛章京八員亦於十八日開洋計
日內俱可到臺地臣因漳浦縣械鬥一案藍元枚
未及辦結隨於本月十六日起程前往查辦今已

將起意糾衆械鬥及傷斃人命各正犯吳春等先行拏獲另有平和縣匪徒周思等糾衆搶奪先經臣訪知飭拏茲平和營遊擊岳新泰探知各匪聚於霞寨堡內即帶兵前往圍拏各犯竟敢用鎗銃刀棍等項抗拒該遊擊督率兵丁奮勇向前拏獲周思周寬等十名並鎗斃周汚一名查械鬥一案尚未敢恃強拒捕其平和搶奪各犯既聚衆多人及官兵擒捕復敢恃械抗拒致兵丁等帶傷者七

人尤為目無法紀臣擬在漳州將拒捕一案凶犯
訊明即正法數人以示懲警然後回至泉州其械
鬥一案尚有未獲名犯現飭速拏俟到日一併審
辦奏入報

聞

初六日

壬寅

上命軍機大臣傳諭常青李侍堯曰臺灣地方三面瀕
海且斗六門鹿仔港及府城外南潭一帶處處俱有

賊匪竄聚將來大兵搜剿賊勢窮蹙內山要隘既有官兵堵截必思乘間逸出海口四散竄逃希圖苟延殘喘亦未可定此係最要不可不預為之備現在兵丁配渡船隻已抵臺灣凡鹿仔港府城登岸之處酌派弁兵分撥各船令其離岸稍遠散布停泊留心查察不使匪犯得以偷渡免脫方為周妥再昨據李侍堯奏前往漳州查辦械鬥搶奪兩案擬在彼審明正法數人再回至泉州等語此案兇犯已拏獲多名易

於審辦設此內亦有天地會匪名目祇可俟將來擒
獲林爽文後再行查辦此時尚非急務李侍堯毋庸
在彼久駐漳州鎮常泰現署提督此等緝拏餘犯自
尚能辦理李侍堯即當仍回廈門駐劄且大兵四路
搜剿保無餘匪竄回內地李侍堯即應督率地方文
武員弁隨時查察實力擒獲

初八日

甲辰

上命軍機大臣傳諭常青李侍堯藍元枚曰閱臺灣圖內斗

六門有溪河數道俱係通海之路大埔林牛稠山一帶現在俱有賊匪竄聚斗六門前據奏久被賊匪佔據南北聲息不通經常青派令叅將潘韜帶兵一千名前往諸羅協剿該叅將因陸路賊多不能前進仍回至府城由海道至諸羅是沿海一帶尚無賊匪即日大兵進剿四路夾攻將斗六門大武隴等處竄踞賊匪廓清掃除設賊匪計窮勢蹙或偷覓小舟由斗六門之溪河逸出海口而洋面島嶼叢襍易於竄匿

希圖苟延殘喘亦未可定不可不預行設法防備著
常青等務揀派得力將備帶領弁兵於通海各溪河處
嚴密防守所有通內山各要隘亦務遵節次諭旨派兵
堵截並將船隻收藏毋令近岸如此四面防堵水陸兩
路俱無虞其乘間竄逸庶可搜剿無遺至恒瑞藍元枚
侍衛章京等計此時早已到齊常青自己承官兵銳氣
方盛之時統領剿賊乘勝長驅其如何調度進剿及打
仗殺賊情形務隨時加緊馳奏至藍元枚前抵鹿仔港後

與普吉保作何調度籌畫曾否先將斗六門一帶賊匪剷除殲戮著藍元枚亦即將籌辦剿捕情形迅速奏聞

初十日

丙午

李侍堯奏言粵兵四千前已俱令由厦

門往常青處四月中旬全數到齊滿兵一千恒瑞帶領亦由厦門往常青處浙兵三千前令藍元枚帶二千往鹿仔港尚餘魏大斌所帶一千臣以常青稱南路賊匪甚多是以令魏大斌亦由厦門往

常青處查十四日得有順風飛渡目下已俱到府城及鹿仔港兩處至臺地近日情形臣叅閱各官稟報並訪問往來船戶等僉稱賊匪所掠米穀漸次吃完現將搶掘番薯作食所得鳳山城内火藥鉛彈亦已用盡林爽文有蓄髮親丁千餘名經諸羅屢敗之後亦十去五六鹿仔港之馬鳴山埔心庄等營盤經內地運往大砲安設之後賊匪不敢來窺伺等語是賊勢漸已衰敗今新兵俱到合之

舊有之兵勢力益加壯盛常青等剋日進剿自必
即有捷音再查黃仕簡任承恩起程時亦自知情
罪重大實無可追蒙

皇上念黃仕簡已經老病任承恩又係殉難任舉之子
且尚未有子息

特加恩待以不死是於法無可貸之中更予以

矜恤生全之路不惟伊二人銜感無地現在漳泉官弁

兵丁無不仰頌

聖主格外施仁非尋常意計所可推測共相傳說感激
俱深合併據實覆奏奏入

上命軍機大臣傳諭常青李侍堯曰賊匪所掠米糧火
藥等物漸次用盡其勢日益窮蹙亦不過如釜底游
魂苟延殘喘至林爽文竟敢令黨羽蓄髮作為親丁
實屬悖逆不法必應盡數殲戮此等匪徒既經蓄髮
轉易識認實屬自留証驗常青等領兵攻剿時但見
有蓄髮者概行殲擒轉可不致漏網也至李侍堯應

遵照前降諭旨即速回至廈門駐劄照料一切為是

十四日庚戌何裕成奏言各縣碾就之米已陸續從

新城縣五福一路趕緊運送又檢查舊案自新城
至五福溪河逆流仍須由旱路起運是以改由海
運較為便捷而省腳價現在札詢兩江督撫俟查
明海船咨覆到日立即分撥起運奏入

上命軍機大臣傳諭何裕城曰軍糈米石關係緊要自
應星速撥運以濟急需前因何裕城奏或由陸路運

送或由海道運閩札商李侍堯辦理殊屬推諉已降
旨飭諭令將碾出米石斟酌何路近便即定於何路
迅速運閩今何裕城既查明舊案新城至五福一路
溪河逆流仍須陸路起撥不便從前曾有改由海運
較為便捷之案自應一面飛咨李世傑閩鶚元令其
預備海船一面即將陸運未竣之米先行運至海口
彼時船隻自己已到齊庶可迅速起運如果米石先到
江省船隻不能早行預備朕自將李世傑閩鶚元治

以避悞之罪乃何裕城計不及此竟俟該督等查明
海船咨覆到日始行分撥起運則咨商往返徒稽時
日豈不貽悞要需何裕城不但意存推諉而於事之
輕重緩急全無主見竟係不善於推諉且不解事矣
著嚴行申飭仍著將此項米石於何日運至海口裝
載起運之處據實覆奏勿再延緩推諉干咎

十五日

辛亥

常青恒瑞同奏言

臣

常青於十一日率

兵往南潭等處搜剿後賊首莊大田等仍恃衆鴟

張於離城二三十里外之大穆降中洲埤頭崙仔
頂等處聚集茲於五月十四日高廉鎮總兵梁朝
桂先到叅贊恒瑞温州鎮總兵魏大斌俱於十九
日到臺灣府城其滿兵一千名惟協領額爾登布
所帶五十六名未到浙江兵一千名惟把總吳森
所帶七十四名未到餘皆於二十二日陸續到齊

臣 常青 臣 恒瑞查看現在帶兵鎖將足數遣用而

福州駐防併粵省浙江官兵皆勇往精壯官軍聲

勢既盛宜即乘銳前驅殲殲醜類臣等一面檄委

副將丁朝雄叅將宋鼎并派臺灣原存兵二千八

百餘名防守府城八門週圍堆卡又於粵省兵四

千名內酌留兵五百名浙省兵一千名內酌留兵

四百名并原調兵二千餘名分撥城外三處營盤

駐劄仍會同臺灣道府獎率義勇人等協力嚴密

防禦一面飭令隨征將弁作速整齊隊伍軍火器

械料理停當臣常青臣恒瑞即親統滿兵九百三

十九名粵省兵三千五百名浙省兵六百名水師
各營兵八百餘名督率鎮將員弁等於五月二十
四日祭纛起程先往鳳山南路一帶賊人分踞之
處跟踪搜剿堵截圍拏隨飛飭柴大紀普吉保徐
鼎士等現在叅贊藍元枚計日已可到鹿仔港即
妥商奮勇會剿並嚴防賊人逃入內山要路則南
北匪衆自不能首尾相顧臣等迅掃南路之後即
乘勝并攻北路大里杙賊人巢穴總期生擒首逆

一舉歲事又前次南路鳳山失事潰散兵二千名
現退回七百餘名復有受傷帶病從沿海陸續回
歸者百餘名其年力強壯技藝頗嫻者尚似可用
臣初到臺灣挑選留存仍隨營打仗復奉

恩旨姑暫貸其一死該兵丁等無不感激輸誠圖報但
其餘未回者尚多且潰散之時亦必有為首之人
容臣於事定後從重查辦以肅軍紀至遊擊鄭嵩
係黃仕簡檄令前赴鳳山即往東港追剿賊匪後

因郝壯猷調回縣城把守南門三月初八日該遊
擊聞知賊人已入東門即帶兵迎擊被賊鎗傷左
臂落馬其親隨兵丁陳日中目覩該遊擊遇害乃
臣於前摺內未經聲叙明晰實屬疎忽再北路蔴
豆庄距府城三十餘里本係糧米相通要路近於
四月間被賊侵擾臣當派革職効力之難厯守備
黃喬千總盧思聰等帶兵三百名前往剿捕嗣據
黃喬稟稱四月二十六二十八等日在溪墘地方

遇賊千餘打仗殺賊二十餘人割獻賊人首級二顆賊遂敗退至五月初八日賊復糾夥數千前來圍庄官兵義民力戰施放鎗砲打死賊匪六七十人奪獲賊械各項惟千總盧思聰中箭陣亡又陣亡兵丁郭順生等四名受傷者三名義民陣亡者三名受傷者八名並請添兵應援等語臣隨飛檄總兵柴大紀酌撥官兵星赴協剿經柴大紀派令遊擊李隆楊起麟等帶兵一千五十名於五月

十二日馳抵蔴豆莊見賊約有二三千人該將等
即率弁兵奮勇圍裏賊被鎗砲打死并殺死者百
餘人又追至灣裏溪邊落水淹死者又有四五十
人生擒匪犯王標等八名奪獲烏鎗刀牌等械因
溪水漲發收軍回藍水港駐劄適又聞哆囉囑一
帶賊匪欲攻鹽水港該鎮即飭遊擊李隆等暫且
留兵該處截拏查守備黃喬於初八日殺敗賊人
之後以所帶兵少恐賊人恃衆又來圍莊即於十

一日移兵暫駐離莊數里之外以備堵截是以十
二日未得與遊擊李隆會兵一處旋因賊已敗退
即帶兵於十三日回郡奏入

上命軍機大臣傳諭常青恒瑞曰此時大兵雲集將軍
叅贊乘此銳氣壯盛統領進剿自必勢如破竹但此
次常青等摺係五月二十四日拜發距前次發摺之
期已隔十日所奏太遲且海洋風信靡常計奏到時
已閱十二日實不勝懸盼煩悶著該將軍等嗣後務

於發摺後七八日即將剿賊情形具奏一次得有勝
仗及擒獲賊首並有名頭目更宜隨時加緊馳奏至
常青所奏鳳山失陷兵丁逃亡未回者尚多交常青
於事竣後嚴查辦理以肅軍紀再賊匪侵擾北路蔴
豆莊有千總盧思聰及兵丁義民陣亡受傷者均應
查明咨部照例賞卹

上又命軍機大臣傳諭常青恒瑞藍元枚曰據常青等
奏統領官兵起程進剿一摺據稱先往鳳山南路一

帶賊人分踞之處堵截圍拏但摺內又稱賊首莊大田等恃衆鳴張仍敢於離城二三十里之外大穆降等處聚集等語賊匪敢於附近府城各處聚集竄踞倘窺伺大兵已出乘虛滋擾雖常青等派有副將丁朝雄等帶領官兵足資堵禦究不免有後顧之虞常青先應將城外賊匪搜剿圍拏將賊首莊大田設法擒獲肅清肘腋方可乘銳前驅至藍元枚帶領浙省官兵由蚶江配船開洋自己早到鹿仔港此時作何

調度籌畫亦即迅速奏聞

十六日

壬子

上諭內閣曰前經降旨將藍元枚調補福建水師提督其福建陸路提督員缺令常青李侍堯於柴大紀普吉保常泰三人內察看孰為出力並才具堪勝提督者保舉一人候朕簡放今觀柴大紀自駐守諸羅以來屢次將賊敗退實屬奮勉可嘉柴大紀著即補授福建陸路提督但柴大紀任臺灣總兵已經數年於

該處情形較為熟悉將來剿賊完竣所有善後事宜
正須該提督隨同常青悉心籌辦柴大紀著以陸路
提督兼管臺灣鎮總兵事務在彼彈壓照料俟軍務
告竣候朕酌量可以調回內地再行降旨柴大紀未
回任以前所有福建陸路提督事務著常青暫行署
理

上又命軍機大臣傳諭李侍堯常青曰向來閩省百姓
捕魚為業者甚多或載赴江浙一帶海口販賣本年

臺灣逆匪滋事該處耕種已稀若漁船不能照常出
洋小民更致失業該督即行查明如有因賊氛未靖
不敢出口捕魚販賣應飭沿海口岸文武員弁明白
曉諭仍令照常謀生毋令失業但宜細查臺灣逆匪
逃亡混入內地者耳不可因噎廢食

臣等謹案閩省沿海居民多以捕魚為業茲因臺
匪肆逆巡察緊嚴諒必有不取出口照常販賣者
我

皇上慮小民無以謀生

特諭令海口文武員弁明白曉示仍令出口捕魚毋致失業海隅細民生計無一不在

宵旰籌畫之中故百姓咸感

生成不復有一夫失所也

上又命軍機大臣傳諭蘇松水師總兵魏轍曰現在臺灣正在剿捕逆匪之時恐有賊黨餘匪逃逸偷渡混入內地該處雖漁汛已過海洋寧謐該鎮仍應在各

海口督飭兵弁嚴密巡查如有逸匪竄入即行堵截擒拏毋得稍生懈怠致賊匪得以混入潛匿

十七日

癸丑

上命軍機大臣傳諭常青李侍堯藍元枚普吉保曰據常青等委員將黃仕簡任承恩解到行在令軍機大臣訊問據黃仕簡供到臺灣後實因年老患病精神昏瞶以致手足無措種種遷延貽誤任承恩供因賊多兵少曾經咨報總督請添派官兵又鹿仔港民居

稠密米糧積聚甚多未敢輕離且伊曾經親往虎仔坑八卦山同普吉保及將弁等督兵打仗彼時林奕文正攻府城聞信繞回護其巢穴并欲來攻鹿仔港是以在彼防守不能遽離因摺內未將自行帶兵親往之處聲叙明晰現有普吉保及將弁等皆可質訊等語所供情節如果屬實將來定案時尚可依朕前降恩旨貸其一死但黃仕簡於上年查辦會匪楊光勳械鬥一案伊雖曾患病朕令伊子黃秉淳馳往看

視並諭黃仕簡如果病勢難痊應令總兵何俊幫伊查辦而黃仕簡奏稱病已全愈仍令黃秉淳回任並稱無庸何俊幫辦是黃仕簡病已漸愈今又以染患風疾忽止忽發為辭恐係藉病推諉冀圖自卸重罪至任承恩正當年富力强尤非若黃仕簡之年老患病者可比伊又自請前赴臺灣剿賊乃既不能奮勇自効坐失事機且伊既咨請督臣添兵何以不行自奏況提鎮奏摺俱係字識繕寫伊平日豈無繕辦奏

摺之人乃現經詰問尚復巧辭支飾則罪上加罪朕亦不能因其父兄著有微勞伊現無子嗣曲為寬貸仍即按律寘以重辟皆所應得著將所錄供詞發交常青閱看查明黃仕簡何故並不帶兵親往有無飾詞却罪並著藍元枚普吉保向將備格綳額林天洛陳邦光等詳細詢問並密加體訪任承恩所供各節是否當日實在情形抑係虛捏狡展之處據實具奏到日再行按律定擬

十八日
寅甲

上命軍機大臣傳諭李世傑閔鶚元日前因何裕城辦理撥運閩省米石意存推諉且既查明改由海運較為便捷乃欲俟咨覆到日始行起運已傳旨嚴行申飭但何裕城既經咨商李世傑等自己早經接到其如何撥派海船於何日駛至海口預備裝載之處自應一面咨覆江西一面將准咨辦理緣由迅速具奏何以何裕城奏到後已閱數日尚未據該督等奏報

軍需米石關係緊要今何裕城既推諉於前若李世傑又復遲延於後豈不貽誤要需著李世傑閱鶚元將此項海船於何日預備齊集派員押至海口及江西米石於何日運到裝載開行之處及因何並不先行具奏緣由一并據實覆奏

欽定平定臺灣紀畧卷二十

欽定四庫全書

欽定平定臺灣紀畧卷二十一

六月十九日

乙卯

孫士毅奏言探聞往來船戶稱五

月十五日以前常青帶領閩粵官兵親身督陣痛
加勦殺該匪等畏懼官兵勇猛計窮力竭林爽文
之母聞已自縊其父亦已潛逃等語現雖未接軍
營捷報傳聞當必有因逆犯既已窮蹙勢必四散
潰逃粵東各海口與臺地洋面處處可通此時防

範搜挐尤難稍容刻懈且於數日前風聞林奕文
密遣夥逆齎帶銀錢偷越外海行刦商船並不搶
奪貨財止將賊船與客船調換點明貨物照本付
價索取船照藉圖影射入口之事此言是否確寔
無從徹底追求惟既傳有此語無論虛寔總應迅
速偵查以絕奸宄已飛檄管轄各海口員弁更須
加倍嚴密訪查且在洋刦船奪照等事非圖窺探
軍情即係預謀免脫若得船照貨物恃為護符儘

可收口投稅掩其叛逆形跡倘一時查察不嚴便
可遠颺漏網臣思匪犯行踪自與客商迴別小民
挾貲牟利計及錙銖其投行發賣必須採訪行情
坐待長落凡與行戶素常交易者又必牽前搭後
收賬耽延若匪徒混跡其中志不在利止圖迅速
出脫以冀踪跡遠竄一切卸貨收銀倉皇急遽自
與客民迴別臣於附近惠潮各屬現已加派妥員
改裝易服分赴各處海口以及稅館處所不露圭

角悉心探訪如有此等商船投行納稅稍露破綻立即知會地方文武員弁帶領兵役赴船搜查即使並無違禁器具而言語支吾情形慌亂即可決其必非善類無論是否臺灣逆黨亦即迅速拏解又查辦天地會匪續據林功裕供出勾引人林三長係平和縣人並據大埔海陽普寧等縣訪獲尤揚等八犯現在提齊質審此外海陽潮陽嘉應州訪出之僧人洪耀珠洪秀節洪朗洪科朱立嵩等

五名雖已嚴訊並無為匪情事恐其中尚有不寔
不盡復飭發各該州縣嚴加管束另候訪察其餘
惠來縣盤獲偷越人犯陳孟琴等七名潮陽縣盤
獲偷越人犯林海瑞等二十九名應俟臺匪蕩平
後咨查原籍果非逆案干連再行定擬尚有碣石
南澳二鎮標惠來營遊擊盤獲閩粵二省形跡可
疑之人先後共十一起計犯一百餘名內五起訊
明寔係商民均已分別釋寧通籍安插其餘六起

現在研訊有無逆黨及會匪在內再行分別究釋
至閩省拏獲逆匪潮民從逆正法者先後共有八
名咨查原籍家屬內張隆生劉寔林天球三犯因
赴臺已久止有遠房族屬並無應行緣坐之人其
餘俱止有縣分並無坐落村庄住址者居多尚須
逐縣挨查方免舛錯遺漏再據赴臺領兵將弁稟
報陣亡病故兵丁數名已先儘軍營通行拔補臣
查出征兵丁偶遇事故所支月餉原有免其扣追

之例若此時遽爾行文開缺查辦該兵家屬播傳
鄉鄰同營出兵之家不免俱生惶惑況現在集兵
進剿若使守汛弁兵聞風氣餒不足以奮戎行而
壯聲勢是以止咨行提鎮密記檔案所有此數名
故兵應得坐糧聽其家照常支領不即行文查辦
統俟凱旋後再行照例辦理

同日常青恒瑞同奏言自二十四日辰刻起兵進
剿南路逆匪出城未及十里即聞有賊三路糾夥

萬餘前來即飭各將備帶兵迎擊自午至酉約打死賊百餘人生擒賊匪何葉等三名賊始稍退收軍察看地勢即於該處之關帝廳安營二十五日滿兵五十名浙兵七十餘名皆已到齊侍衛章京烏什哈達一員先到二十六日早臣等帶領衆將弁等各帶兵丁義民分隊出戰詎料賊人又連夜糾集中路大武壠等處賊黨亦約有四五千入各冒鎗砲鋒刃抵死攻犯臣等統領官兵督率調度

各鎮將俱屬奮勇出力因賊人直撲左翼臣等即
飛撥中隊兵三百名交那穆素里帶往協助烏什
哈達又將義民數百名作為疑兵誘賊鎗砲齊發
打死賊人二三百名自辰至未因暑熱收兵查陣
亡守備林世春千總謝元把總林茂貴外委盧鳳
等四員陣亡兵丁林進等十八名義民五名受
傷兵民共三十六名現今民人被脅從賊者甚
多其小庄盡被焚劫大庄之房屋俱被佔踞此外

樹木密翳之所到處潛藏官兵一往搜捕即蜂擁而來是日臣等全軍盡力剿殺官兵義民儘數出陣至酌留府城防守之兵五千九百名因臺灣地氣潮濕時值炎熱雨水頻漲該兵丁不服水土受病者多且有挑刺軟弱者在此是以不能將此項存兵調赴軍前應用臣常青臣恒瑞據現在情形再四籌酌若非添調勁兵無以痛剿賊匪臣常青初到臺灣識見短淺僅奏請添兵七千寔屬不敷

俟事竣後請將臣交部治罪今臣常青與臣恒瑞親歷行陣目擊賊勢蔓延前調兵力尚覺不敷進剿仰懇再調廣東兵四千臣等即先咨會督臣孫士毅如潮州有挑備兵丁先發二千來臺灣再行續發二千再調京兵一千湖廣兵四千貴州兵二千共兵一萬一千除長途倘有患病疲弱外亦得勁兵一萬餘名則臺灣賊匪即可剿捕淨盡臣等仍統現在官兵相機進剿一有勝仗即行奏報再

查臺灣道府永福楊廷樺辦理軍需糧餉人夫派撥義民均無貽誤該員等兼有守城之責今調兵萬餘錢糧不無浩繁仰懇派一大員前來臺灣督辦軍需則事有責成似於軍務有益

同日藍元枚奏言二十日到鹿仔港浙江官兵船隻陸續進口於二十二日亦俱到齊有義民首林湊黃奠邦蕭士旭等率領義民迎接臣以鄉音宣講

聖諭曉以大義衆民感戴涕零莫不踴躍懇乞隨同官

兵剿捕賊匪

臣

安頓各官兵劉營後於次日即親

到街市撫慰安集難民訪察地方賊勢情形知賊

匪俱集在柴坑仔大武郡一帶窺伺鹿仔港勢甚

猖獗隨於二十三日夜密會總兵普吉保於四更

進兵帶遊擊海亮都司陳邦光守備丁士偉兵一

千名在鹿仔港西南八卦山堵禦賊匪防賊從山

下來截路又派守備張奉廷帶兵三百五十名并

義民在鹿仔港之東北大肚溪旁堵禦防賊過溪
截路臣親帶遊擊琢靈阿穆騰額守備唐昌宗潘
國材兵二千三百名并義民前往柴坑仔大武郡
直攻賊巢於二十四日辰刻官兵行至彰化北門
望見賊匪約七八千人前來迎敵臣見四處溝圳
甚多隨棄馬步行在陣前率領官兵前進施放鎗
砲賊分南北二隊迎敵臣即帶兵千餘在北邊對
敵撥穆騰額唐昌宗帶兵千餘同義民在南邊對

打鎗砲自辰至未打死賊匪約五六百人追至大肚溪旁南邊賊匪交手接戰臣見賊勢尚盛隨親率北邊官兵沖殺賊不敢過溪由山邊竄走隨將柴坑仔大武郡渡船頭三庄賊巢燒燬生獲賊匪王皆郭丕二名兵丁義民繳驗耳記二十六個大砲三尊竹篙鎗挑刀烏鎗等件賊旗十桿又在庄內收獲賊書信五張總兵普吉保率同遊擊海亮帶領兩提標兵五百名守備丁士偉帶領浙兵五

百名共一千名由八卦山進攻快官庄堵截賊匪
辰刻到彼有賊千餘前來迎敵官兵即放鎗砲賊
人敗退隨將該處賊庄燒燬正在燒庄間南山梁
復有二三千賊前來接應當即親率官兵齊放鎗
砲奮勇前攻鎗砲打死賊人甚多賊即四散奔逃
官兵奮勇追殺天晚撤兵又守備張奉廷帶領兵
丁義民前赴大肚溪地方堵禦有賊衆千餘人屯
聚隔溪即督令兵丁在溪邊用砲連環施放打斃

手執紅旗賊目一名執藤牌賊一人騎馬賊一人
又賊夥數人賊衆奔散查守備唐昌宗千總魏際
隆把總羅洪燦外委潘健吉兆陣亡至傷亡兵丁
義民現飭將領查寔另行咨報將軍臣常青核辦
所有搜獲賊書五張送交軍機處以備存查

同日普吉保奏言鹿仔港逼近大里杙賊巢賊匪
不時滋擾自四月十二三十三十六十八二十一等
日屢來侵犯經臣帶領官兵鄉勇堵禦殺退因殺

賊無多不敢陳奏業經咨報將軍常青在案四月二十五日接將軍常青札逆匪林奕文往攻諸羅現駐大埔林牛稠山一帶令臣在於鹿仔港等處駐兵內抽撥親自帶領前赴夾攻臣除留兵堵禦各營盤外酌抽兵一千於四月二十六日親率遊擊海亮守備唐昌宗帶領前赴與總兵柴大紀訂期合剿五月初五日柴大紀來至大埔林知林奕文被官兵挫敗已回大里杙伏思餘黨諒多仍在

斗六門正在商議進剿旋據諸羅縣知縣陳良翼
差稟南路賊匪陳靈光等率衆勾結大武壠賊匪
欲攻縣城速請帶兵回縣堵禦又據副將林天洛
格綑額等具稟四月二十八日五月初一日賊匪
數萬分路圍攻鹿仔港馬鳴山埔心庄各營盤雖
經林天洛等殺退而賊匪恃衆仍復猖獗臣即於
初四日撤兵兼程回顧鹿仔港初六日到鹿仔港
查訊各路賊情屬寔併將打仗殺賊情形咨報常

青現在叅贊提臣藍元枚帶領浙兵二千名於五月二十日抵鹿仔港隨於二十四日調撥官兵進剿令臣帶兵一千名由八卦山進攻快官庄叅贊藍元枚督兵分路勦捕田中央等處所有打仗各情形經叅贊提臣藍元枚奏明在案至臣自到鹿仔港將及四月尚不能搗穴擒渠剋期蕝事寔屬罪無可逭乃蒙

聖主天恩仍留軍營帶罪自贖臣惟有身先士卒奮勇

殺賊斷不敢稍有貽誤致滋重咎

同日李侍堯奏言接臺灣道府稟稱臺地風俗慣
用外洋銀錢向來內地解到餉銀俱就行戶易換
應用時日從容尚易辦理現因大兵出征所需夫
價車價等項需用繁多郡城一隅之地兼以商販
罕通洋錢日少易換維艱懇將軍需銀兩在內地
俱換洋錢解用等情查該處既慣用洋錢自應換
解前往以便行使隨發銀十五萬兩派省城及泉

州漳州廈門等處分頭易換現已換得六萬圓先行起解餘俟隨得隨解外第閩省行使洋錢之地祇此數處恐將來再需易換民間益少或致趕接不及粵省向亦慣用洋錢廣潮二府行使最多今應奏明令兩廣督臣孫士毅撥出庫銀四十萬兩分作數起按照市價陸續易換洋錢解閩以資接濟並知會浙省撫臣亦於庫項內酌撥六十萬兩前來備用再本日又接江西撫臣何裕城來札知

撥運之米已於五月二十六日起在新城縣五福地方起運查 臣前奉

諭旨後即撥銀一萬兩委延建邵道元克中邵武府馬騰蛟前往光澤縣之上水口接收並料理催船撥運等事又行令汀州福州二府催備船隻前往光澤縣聽候撥用均可源源趕運不至遲誤再本日接到常青等抄錄摺稿知賊匪甚多現須添兵剿捕 臣前於奏調浙兵之後惟恐臺灣尚有需接濟

之處隨查督提兩標及上遊延津等營可以酌量
抽撥因即密令挑取二千名前來泉廈駐劄以備
緩急已於五月下旬到齊今常青處既需添兵即
於日內將此項兵由廈門配渡星速前往至粵省
兵較多前亦已密札兩廣督臣孫士毅再行酌量
預備據稱已密備二千在潮州守候現在常青已
飛調粵兵想孫士毅即調發前來臣已飭漳州一
路預備並飭廈門同知速備船隻候渡

同日徐嗣曾奏言泉州回省途次接將軍臣常青
叅贊臣恒瑞咨會現在奏請添兵臣即星馳旋省
督率各屬於建寧延平一帶過兵處所妥立章程
預為備辦以期師行迅速至常青等奏請

簡派大員前往臺灣督辦軍需一事竊思內地糧餉等

項現經督臣李侍堯駐紮泉州盡心籌酌儲備俱

已充裕惟臺灣調兵踵接錢糧動用浩繁該道府

等恐難兼顧臣自問年力尚壯於該處事宜粗悉

大概仰懇即令臣迅速前往督同道府辦理軍需
所有巡撫印務並懇另行

簡放均奏入

上命軍機大臣傳諭常青恒瑞李侍堯藍元枚柴大紀
普吉保曰孫士毅摺內稱林奕文之母聞已自縊其
父亦已潛逃解到賊犯林家齊等亦有林奕文之父
因其子為逆畏罪自縊之供常青在臺灣駐劄日久
亦必得有此信何以未據該將軍奏及至常青等統

兵出城進剿遇賊蜂湧前來抗拒乍見兵少賊多未免稍覺驚惶但調及京兵湖廣貴州兵丁動經數省又隔重洋未免緩不濟急臺灣更覺炎瘴尤恐水土不服若簡派京兵又需大員帶往未免駭人觀聽跡涉張皇已另降諭旨派廣東杭州駐防滿兵三千名及李侍堯摺內先行調本省兵二千名合之常青等現在咨調粵省兵四千名及孫士毅挑備兵二千名已足該將軍所奏一萬一千之數以九千名前赴常

青處聽候調撥其餘二千名著往鹿仔港以助藍元
枚之力自足敷南北兩路攻剿之用至藍元枚奏帶
領浙兵在柴坑仔大武郡等處剿殺賊匪燒燬賊庄
各情形一摺看來藍元枚一路剿賊尚覺得力至此
次續調之兵一萬一千名雖皆係附近省分之兵派
撥分起配渡不得即刻便能抵彼至速亦須月餘著
傳諭該將軍等如有可進之機即行來勢攻剿果南
路賊勢衆多不能取勝亦不可冒昧輕進再藍元枚

處附近賊巢虎仔坑大里杙一帶閱其所進圖說賊
匪亦不為少雖屢得勝仗亦應持重審慎此時斗六
門大武壠一帶尚有賊匪佔踞道路梗阻朕思該將
軍等此次統兵出城不及十里即遇賊打仗被其攔
阻尚未進剿或事勢稍定兵氣振作仍統兵前進將
南路賊首莊大田拿獲恢復鳳山縣城固屬甚善倘
因官兵單弱俟添調兵丁到後再行攻剿則各省調
撥前往正需時日豈有在彼駐守多時按兵不動之

理朕意常青現在派守郡城兵丁有五千餘名不為不多或再行抽撥數百名將備內如蔡攀龍之可靠者一二員帶領在郡城幫同嚴密防守常青等竟統領官兵直趨北路會同藍元枚柴大紀普吉保打通斗六門一帶進逼大里杙覆其巢穴使賊匪聞信驚惶進無可據退無所歸脅從之衆各顧家屬自必紛紛潰亂此亦出奇制勝之一法著常青藍元枚等審度該處情形相機妥辦據寔覆奏亦不必稍存遷就

之見再藍元枚進到圖說內有岸裡社熟番三千餘人不肯從賊等語此等熟番被賊誘脅不肯附從即與義民無異藍元枚即應速為慰撫給與馬兵糧餉令隨同官兵打仗於聲勢益覺壯盛若不給與養贍該番等在社既為賊匪焚燬無以資生豈不去而從賊並著常青等南路如有似此不肯從賊之番社民壯皆應招集獎撫或令入伍以壯聲威而分賊勢但須詳慎查察恐其中有賊匪混入希圖內應之事不

可不加意嚴防也再現在大里杙水沙連等處賊巢
內有民人十餘萬因衣食缺乏多有從賊入夥者若
因其從賊打仗即不准其悔罪投誠此等脅從民人
永無自新之路轉堅其從賊負固之心所關匪細著
常青藍元枚等一面出示曉諭無論從賊打仗及被
賊驅使者一經棄械投誠即為良民或諭令歸耕各
安本業或有隨營自効剿賊立功如莊錫舍者即酌
量獎拔至林爽文不但上千國法而且累及父母寔

屬罪大惡極覆載不容斷無不速就殲滅即使藉詞
地方官平日擾累以致伊等激成事端但地方文武
俱為所戕害更復何所藉口且朕患愛黎元休養生
息雖臺灣遠隔重洋撫綏軫恤從無歧視現在被脅
民人具有天良斷無始終附逆甘心從賊之理況賊
匪雖猖獗皆為烏合究易潰散此時脅從者將未徒
受其累同歸殲戮亦何所貪戀而不速行悔罪自新
耶著常青藍元枚將此傳旨詳悉出示曉諭俾脅從

百姓及早投出歸耕賊黨自日見離散漸就窮蹙再
普吉保與柴大紀訂期合剿今普吉保已將回至鹿
仔港會同藍元枚剿賊情形奏聞而柴大紀剿賊之
處未據奏到甚為廛念著傳諭柴大紀即將回至諸
羅如何剿殺賊匪情形迅速具奏又據李侍堯奏現
已移咨粵省撥餉四十萬易換洋錢及撥解浙省餉
銀六十萬兩並接運江西米石之處均應如此辦理
並著孫士毅不拘何項即行如數易換洋錢迅速解

往備用至常青等此時攻剿賊匪如得勝仗擒獲賊首所帶官兵足數剿辦餘匪毋須多兵接濟即酌量情形一面飛咨各該省停其前往一面奏聞以省跋涉之煩

上又命軍機大臣傳諭常青李侍堯存泰孫士毅寶琳琅玕徐嗣曾曰常青等於各路官兵到齊即統領將弁等分隊進剿連次殺賊因賊匪四處糾合夥黨蜂擁前來抵死抗拒現在所帶兵丁不敷攻剿奏請再

行添調自屬寔在情形或因初次與賊接仗乍見賊匪勢甚鴟張現在兵力不能即時撲滅是以奏請添調亦未可定但該將軍等既以官兵尚覺單弱不敷痛剿自應再行添派以期迅速集事粵省已據常青等咨會孫士毅調兵四千該省原有預行挑備兵二千前後共兵六千著孫士毅即行揀派速往此外著存泰圖薩布於粵省駐防滿兵內挑選一千五百名並著寶琳琅玕等於浙省杭州駐防滿兵內挑選一

千名乍浦駐防滿兵內挑選五百名派令前往著傳諭孫士毅等星即遵照挑選迅速分撥起程較前次派往者愈速愈妙所有粵省駐防滿兵著派副都統博清額帶領浙省駐防滿兵著派已陞授江寧將軍乍浦副都統永慶帶領前往其粵省綠營兵六千著孫士毅於曾經行陣之總兵內簡派一員總領前往並於各將弁內揀派諳練軍旅及曾經出兵者分起帶領孫士毅此次辦理官兵起程及一切事宜俱能

經理妥辦諸凡留心甚為可嘉今所續調粵兵六千名該督更宜加意照料令其迅速起程以資征剿之用浙省駐防滿兵亦著寶琳琅玕一體妥為料理分起加緊進行並著李侍堯徐嗣曾預為籌備船隻等項於各兵到時即行陸續配渡至常青等奏請派一大員前赴臺灣督辦軍需一節若由別省派往未免需時且恐呼應不靈因思李永祺曾任川省道府辦理軍需尚為熟手著即派該臬司速赴臺灣督辦軍

需等務現在閩省秋審已過臬司尚無承辦要務著
李侍堯於道員內揀派一人署理再閩省現辦軍務
差委需人已於此次保舉道府內簡派伊轍布德明
額李滉李華國袁秉義成明於到閩後著交李侍堯
酌量分派二三員前往臺灣聽候常青差遣如內地
料理兵丁船隻等事需員派委即酌留二三員於內
地委用以資差遣


同日李侍堯徐嗣曾同奏言接准部咨臺灣道永

福因前在湖北荊州府任內失察歷任知縣諱盜
匿詳一案經部議革職但臺灣自上年十一月賊
匪滋事該府孫景燧已在彰化被害府城中惟該
道督同知縣等糾集義民與該鎮柴大紀所領弁
兵悉力堵禦賊匪連次攻擾俱免踈虞本年正月
初間各營征兵到臺灣之後一切糧餉皆係該道
經手現在大兵進剿各路府城內外既需大員彈
壓鎮撫而接應軍營糧餉正資熟手料理可否將

該道暫行留任免易生手較為有益奏入

上諭內閣曰永福著照該督等所請准其暫留福建臺
灣道之任俟大功告竣該督等核其功過具奏到日

再降諭旨



欽定平定臺灣紀畧卷二十一

欽定四庫全書

史部

欽定平定臺灣紀畧卷二十四

至

內閣中書_臣沈颺覆勘

武英殿纂修中書_臣彭元琬

欽定四庫全書

欽定平定臺灣紀畧卷二十一

六月二十日

丙辰

上命軍機大臣傳諭常青藍元枚曰閱藍元枚所進圖
內該叅贊等駐劄之鹿仔港迤南東螺社麥仔寮二
處在紅線外近海邊處所有賊巢二處現在鹿仔港
一帶一切軍糧文報皆由海面通達幸而賊匪無能
未至此處佔踞倘賊匪於東螺溪等通海口岸私設

船隻攔截隘口使軍糧文報及官兵來往俱被阻隔
所關非細或賊匪勢窮力竭由此入海而逃更難追
捕朕意現在藍元枚等剿捕柴坑仔大里杙一帶賊
匪若未能即時廓清尚需兵力厚集則莫若趁此添
調各兵未到之前統領將弁先將東螺社麥仔寮二
處賊巢盡力剿毀或于往來海口安設官兵派員把
守毋使賊匪得以竊踞亦先事預防之一法著藍元
枚等相機籌畫遵照辦理至臺灣府城一帶有常青

等率領重兵在彼足資抵禦但附近城外在在皆有賊匪屯聚鹿耳門為一郡咽喉文報兵糧往來要隘恐賊匪狡黠未必不心生窺伺常青等不可專注意南路稍存大意仍當酌派妥當將備加意防守為要再此時賊匪鴟張勢雖衆多但究係一時迫脅烏合之徒易于潰散著傳諭藍元枚等遵照昨降諭旨務需諄切出示即稱遵旨曉諭各庄社被脅從之衆皆知悔罪自新則賊黨自當解體仍著藍元枚等將近

日剿賊情形並海口要隘有無賊匪屯聚阻隔之處
據實迅速覆奏

上又命軍機大臣傳諭福康安勒保曰常青本由都統
將軍甫經簡授總督更事未多今自到臺灣後一切
調度尚能妥協已出意料之外但伊究竟年逾七旬
精神未能周到而恒瑞又係年輕未曾更事之人殊
不可恃且常青等昨奏請派一大員到臺灣督辦軍
需其意未必非自揣難以勝任欲朕另簡大臣前往

督辦軍務不可不預為籌及朕思此事自應阿桂前往督辦但念伊亦年逾七十之人不忍令其遠涉重洋和珅又現在不時手足舊疾復發且朝夕扈從承旨書諭難以分身將來派出之領兵大臣如海蘭察等亦非常青李侍堯所能統轄駕馭者因思福康安年力富強於軍旅素為諳練又能駕馭海蘭察等若以之前往督辦足資倚任現在甘省亦無緊要應辦之事著福康安接奉此旨即帶印由驛起程前來行

在陞見預備差遣所有陝甘總督著勒保赴甘省署
理福康安於途次遇見勒保時即可將印信交接尤
為便捷若常青等續有奏報剿捕賊匪業已得手不
難剋期集事即馳諭福康安仍可於途次回甘肅本
任勒保亦回晉撫之任

臣等謹按將軍臣常青等因賊勢猖獗奏請添兵
而于遠隔數省鞭長莫及竟未暇深籌自係猝見
賊多兵少不免心存惶惑我

皇上已于隣近省分如數撥付而猶慮常青年逾七旬未能周到恒瑞又少未更事恐不能迅掃賊氛因特諭陝甘總督臣福康安馳驛前往

行在預備差遣迨後賊匪日久稽誅遂星馳前往一舉肅功良由

睿算先操神機豫定也

二十一日丁巳李侍堯奏言閩省軍糧現在隣省協濟之米已覺充裕但近接常青知會以賊匪甚多

又請添兵勦捕則米糧自以多備為要兼以臺灣
支給鄉勇撫卹難民等項需米甚多又近日漳泉
一帶雨澤較少晚禾尚未栽揀將來不免平糶等
事則閩省籌備米石自以多多益善臣再四籌酌
江蘇省既脩賑米十萬石似應即令陸續委員運
閩以裕儲備又常青既請增調官兵是以臣將豫
備在泉廈之閩兵二千名即令配渡前往並兩廣
督臣孫士毅亦有預備在潮之兵二千名想接常

青咨調即先令此兵前來惟所調黔楚之兵似覺太遠

聖明自有指示而征兵既增則一切糧餉火藥及過兵各事宜俱須預為籌脩現在米糧銀餉火藥三項俱已寬裕其由粵入閩過兵各站既有前次章程可以照辦至由浙入閩之路亦扎致撫臣徐嗣曾酌定章程檄飭各州縣預脩惟船隻一項廈門蚶江本港船不過七八十隻近因差使較多已飭沿

海州縣協催今既增添大兵則船隻亦須增備查
浙省現有運米到閩之船臣現飭蚶厦兩廳擇其
可赴臺灣者暫行催留先賞給口糧臨時再從優
給以催價其未熟臺灣海路者則代催舵工水手
駕駛各船戶等俱甚樂從其餘一切事宜臣惟有
悉心籌度以期無悞奏入

上命軍機大臣傳諭李侍堯李世傑保寧閩鶚元曰前
因閩省需用米石有浙江江西二省採買三十餘萬

石足敷儲脩是以李世傑奏請碾米十萬石運閩諭
令且毋庸配船起運並諭李侍堯察看情形如閩省
糧米尚有未敷再咨會李世傑等委員押運今臺灣
勦捕賊匪現又添調兵共一萬一千名則軍糈自應
預為寬脩兼以臺灣支給鄉勇撫卹難民並預脩漳
泉平糶等事所需米石不妨多多益善著李世傑閩
鄂元即將前次碾出倉穀脩運米十萬石迅速派員
配船起運以濟急需再川省素為產米之區連歲收

成豐稔積儲較裕並著保寧速將川米脩辦二十萬石即由川江迅速運至江南交李世傑閔鶚元一併委員運赴閩省於軍糈民食更為寬裕李世傑閔鶚元務須將船隻預行脩辦齊集一俟川米運到即可星速配船陸續起運毋又若何裕城之推諉遲緩致悞要需李侍堯按奉此旨不妨將現在又於江南川省運米數十萬石前來接濟之處先令閩人知之俾軍民口食有資市價不致踊貴方為妥善

上又命軍機大臣傳諭李侍堯曰朕以湖廣貴州等省
兵丁與福建相隔數省未免緩不濟急已降旨派調
附近閩省之粵浙二省駐防滿兵三千名及粵兵六
千名合之李侍堯現在配渡之二千名已足該將軍
等所請之數足敷攻剿今李侍堯奏黔楚之兵似覺
太遠是李侍堯業已見到及此適與朕意脗合而常
青並未能計慮及此看來常青見賊匪衆多未免著
忙胸中畧無主見為此甚憂之至所請京兵朕未嘗

不早為籌及此時若即令前往不但伏暑炎歊長途跋涉未免延緩并慮迹涉張皇且京兵調動則派出之領兵大臣亦必須重臣統率常青昨奏請派大員到臺灣辦理軍需其措詞雖為督辦軍需起見而其意未必非自揣難以勝任欲朕另派大臣前往督辦軍務是此事恐非常青等所能辦理完結是以昨已密諭福康安令其馳驛前來行在陛見彼時若常青等剿捕賊匪不能得手其勢必須調撥京兵即可令

福康安統領前往督辦如日內該將軍等續有奏報
剿賊得勝之信即令福康安于途次仍回本任原可
備而不用此朕慮事于先之苦心也著將此先諭李
侍堯知悉再李侍堯奏蚶江港船本少現將浙省運
米到閩之船擇其可赴臺灣者暫行催留等語所辦
甚是預行籌備臨期方可過渡不至稽遲至此添調
兵丁內有廣東浙江二省駐防滿兵各一千五百名
此項兵丁雖不能如京兵之驍勇然較黔楚綠營自

為得力且與閩省接壤道路較近可以早抵該處以資攻剿之用李侍堯于各該省續調兵到遵照昨降諭旨以九千名撥往常青處以二千名撥往藍元枚處帶領進剿總以愈速愈妙再前據孫士毅奏林爽文之母聞已自縊其父亦已潛逃等語前解到賊犯林家齊亦有伊父勸誡不從畏累自盡之供自非無因總未據常青奏及李侍堯駐劄廈門耳目較近自必亦有所聞著即將此事詳加訪問無論虛實即據

該督所聞具奏

二十三日己未李侍堯奏言前在漳州時據臺灣各

官稟稱賊中米糧火藥將盡逆首林爽文蓄髮親

丁亦十去五六意謂大兵一出即可勢如破竹昨

忽接將軍常青等咨會五月二十四五等日出城

遇賊互有勝負並奏請增兵一萬一千以資協剿

殊勝駭異是從前各官所稟賊勢稍衰之處即係

賊匪布散流言以懈我師而非實在情形也今南

路賊首莊大田于官兵未出之先預約賊首林興
文來援林興文先遣伊弟帶二三千賊至三坎店
又自帶衆賊欲先攻鹽水港即會攻府城則常青
等出城所遇之賊想像南北兩路賊匪已經會合
併力抗拒又府城北面三十里外之蔴豆社為薪
米入城之路有十餘庄向未殘毀近亦被賊焚掠
一空而普吉保於五月初間甫至土庫欲與柴大
紀會剿又聞賊乘間來擾鹿仔港之埔心庄等處

遂急回兵救援而沿途所過之棋盤厝等庄又被賊焚搶是賊直欲將各處不從賊之庄盡行搶擄使菊薪等項俱無所出前據柴大紀奏報諸羅城外已有賊匪截路禁薪炭入城之語近又據副將格綱額稟稱鹿仔港近地無可樵採柴薪甚是難得是賊即不與官兵接仗而官兵已為所困况現在賊勢昨見藍元枚奏稱漳化北門外遇賊七八千普吉保在快官庄遇賊二三千守備張奉廷在

大肚溪亦遇賊千餘恒瑞札稱府城外來抗之賊
實有萬餘而埋伏各庄者更不計其數又存留府
城之兵因水土不服病者千餘是目下南北兩路
俱有賊多兵少之勢今不從賊之庄已被殘燬所
存祇府城諸羅鹿仔港數處所關非細惟有仰懇
添派大兵用全力痛加殲除庶可及早肅事查閱
兵存營無幾未便再調惟漳州鎮有兵四千上年
因林爽文賊夥多係漳人是以獨未調用然派往

藍元枚處俾漳人統漳兵或未必不得力而以之
派往常青處臣亦不敢無慮况賊既鳴張漳州聲
息相通臣現在風聞有逆首林典文密遣人來內
地勾結會匪之說雖語出無稽而現據仙遊縣盤
獲自臺灣渡回十三人內有陳班一名驗係半截
髮辮頭有傷痕形跡可疑現飭提犯來泉審究是
漳屬一帶亦不可不預為防備臣擬再調浙江兵
二千名到泉州廈門駐劄以示形勢而備緩急奏

入

上命軍機大臣傳諭常青李侍堯藍元枚曰賊勢甚為猖獗且播散流言懈我軍心尤為可恨看來常青處兵力不敷急須添兵助剿前于常青等奏到時即降旨添派已足一萬一千名之數並令各該督等迅速挑撥發往又據李侍堯奏接恒瑞札稱府城外來抗之賊實有萬餘埋伏各庄者更不計其數等語前常青同恒瑞統領將弁出城分隊剿賊是恒瑞與常青

同在一處如有札會該督事件自應聯名咨達何以
此次李侍堯所接之札祇係恒瑞出名豈恒瑞與常
青又分為兩路抑或係常青年老偶患疾病未能會
辦亦未可定朕心甚為懸注若李侍堯另有所聞即
行據實覆奏再前日普吉保已將回至鹿仔港會同
藍元枚剿賊情形奏聞而柴大紀剿賊之處尚未據
該鎮奏到今據李侍堯奏諸羅城外有賊匪截路不
令薪炭入城又據格綢額稟稱鹿仔港近地無可樵

採柴薪難得是賊匪甚屬鴟張而藍元枚於二十三
四等日進兵打仗剿殺賊匪後亦未據續有奏到著
李侍堯即將藍元枚柴大紀等連日如何堵禦攻剿
打仗得勝情形一得地方官稟報即隨時迅速加緊
馳奏又據李侍堯奏閩兵存營無多未便再調惟漳
州鎮兵四千前因林興文賊夥多係漳人未經調用
然以派往藍元枚處以本籍之人帶領本籍之兵未
必不得力所慮甚是自當如此辦理至漳泉一帶會

匪甚多賊首林典文遣人勾結之說雖得自風聞不可不留心防範總以靜鎮為要至該督擬調浙兵二千名到泉州廈門駐劄一節浙兵向來怯懦無用即調駐漳泉亦不得力徒勞跋涉更致虛糜且需時日朕意閩人素稱獷悍且遊手無藉者更多不若即在閩省就近召募俾食錢糧以充營伍伊等自必樂從可以一呼而集較之浙兵既屬勇健可恃且遊手無藉之徒亦可收以為用不致為匪實屬兩有裨益李

侍堯接奉此旨即在該省先儘漳泉一帶速行召募
并不必拘定額數即多募數千以備巡防調撥之需
亦無不可如恐經費不敷即速行奏明再由鄰近省
分撥運解往應用並著常青藍元枚亦各就郡城鹿
仔港一帶廣行招募即曾經被賊迫脅附從者一經
應募投到不妨即令充伍不必以曾經從賊過為區
別疑而不用以安反側如此辦理不但兵力可以日
增且官軍中多得一人即賊匪少一黨惡既可以充

實營伍又可以解散賊黨常青藍元枚等務須迅速
妥辦以期兵數倍增可免遠省調動之費又收化莠
為良之益

同日孫士毅奏言接准將軍臣常青叅贊臣恒瑞
知會如潮州有挑脩兵丁即先遣發一千名由厦
飛渡來臺隨後再脩二千名候

旨到日續行遣發查前次粵兵四千名赴臺會剿俱在
附近潮州等營挑撥臣恐弁兵抽撥已多不足以

資堵緝是以先經與提臣高瑒商酌選派督標兵一千名提標左翼鎮標水師兵各五百名共兵二千名並派定帶兵將弁及一切軍裝器械火藥鉛彈俱令攜帶足數分駐海陽潮陽等縣各海口嚴密巡防查拏竄匪稍補前次抽撥之數今既接到閩省來咨必須添調即將此項預備堵緝之水陸兵二千名即日飛飭迅速啓程臣親赴黃岡點驗出境以五百名為一起接連前進不復間日行走計

六月十三日粵兵二千名全數俱入閩境其後調之二千名現在一面派撥一面行調目下盛夏大雨時行如溪河通達即由水路來潮可節沿途糜費至臺地既請添兵火藥必須寬裕臣即于此次各兵隨身攜帶火藥外復就附近各營抽撥三萬斤隨後解赴閩省撥用仍札飭藩司許祖京催辦硝磺趕緊補額並預脩裹帶一月口糧運送廈門支發至臣前將臺灣連得勝仗並風聞逆匪窮蹙情

形冒昧入告茲常青恒瑞咨調粵兵赴臺會剿是
前次探聽未確實深惶悚臣現聞五月二十六日
與賊打仗官兵踴躍爭先是日陣亡守備千把共
有四人均係粵省員弁是粵東官兵頗肯勇往向
前奮不顧身尚為得力所有常青等令臣聽候
諭旨再行飭令起程之二千名仰懇

准予調臺協剿庶于軍營有裨奏入

上命軍機大臣傳諭孫士毅曰前據常青奏到派調粵

兵一摺已降旨諭令該督先將挑備兵二千名速行赴閩再續調兵四千名共足六千名之數又派駐防滿兵一千五百名一體派撥赴期配渡計此時該督已接奉前旨即行辦理矣該將軍等奏請派調官兵朕豈有不撥之理原可不必候旨除從前挑備之兵二千名該督已據咨令其分起行走此刻自早入閩境其餘粵兵四千駐防滿兵一千五百名該督亦須先期預備船隻派員照料起身莫致遲悞愈速愈妙

至該督奏於此次各兵隨身攜帶火藥外復就近各營抽撥三萬斤隨後解赴閩省備用之處火藥為行軍利器自應多為籌備所辦好實屬可嘉至粵東距臺灣遠隔重洋傳聞不實亦屬事理之常該督即據所聞入告頗見急公又何妨碍耶嗣後如得有信息總當隨時迅速具奏以收兼聽並觀之益即偶有不甚確實之處朕亦不加之責備也

上又命軍機大臣傳諭常青李侍堯舒常曰常青現在

臺灣督辦軍務其湖廣總督之任雖經舒常署理而
常青係正任自有應得廉俸等項但現在閩省既不
支給而湖廣又不便差賚送該將軍在臺灣一切
用度何所仰給著李侍堯將常青應得湖廣總督分
例養廉即在閩省庫內按數給支以備盤費之用將
來或由楚省遇便搭解撥還原款或即在閩省藩庫
內開銷俱無不可

二十四日

庚申

上命軍機大臣傳諭常青李侍堯曰逆匪林興文等糾衆不法刦縣戕官實由該地方官平時貪黷廢弛殃民斂怨以致奸民有所藉口釀成事端除現在文武各員俟該將軍等于事竣後查叅嚴辦外其此次被害各員內前據閩省獲犯供稱同知董啓埏劉亨基官聲狼藉最為地方之害而長庚湯大奎則據該將軍等查明遇賊不屈被害因思該員等平日居官操守若何有無擾累地方情節及遇賊時孰為抗節捐

軀孰為貪縱激變該省官民自有公論著常青李侍
堯確切訪查若有居官素稱廉謹尚不擾累地方及
到任不久賊衆倡立匪會並非其任內之事而遇賊
時實能激發忠義仗節自殉者具奏到日自當降旨
仍予議卹其貪黷不職斂怨激變而遇賊時猝然被
戕並非出於義憤以身殉難者即當停止議卹以儆
貪劣而示彰瘴業將已經具題議卹者暫行停給其
未經咨部者概從緩辦統俟該將軍等查奏到日另

降諭旨至林爽文糾合匪徒煽誘百姓皆以地方擾
累為辭該處民人被其用威迫脅以致日聚日衆但
被脅民人具有天良常青等此時當遵旨愷切曉諭
以林爽文罪大惡極勢雖猖獗祇屬烏合之衆指日
即就殲除至附從百姓本屬安分良民不過被賊威
脅無奈聽從並非出於本願且伊等即因地方官平
時不無擾累激成事端但俱已身被戕害已足伸伊
等怨忿之心況朕惠愛黎元休養生息臺灣雖遠隔

重洋撫綏軫惜從無岐視伊等身被深仁渥澤天良
難昧又何所顧忌必欲始終從賊而不速行悔罪自
新乎若執迷不悟大兵雲集必至玉石俱焚悔將何
及伊等務須熟思利害及早自新若能即行投出毋
論從賊與否皆屬子民不但可免治罪且仍得安業
歸耕入伍食糧如伊等能將有名逆首頭目擒縛獻
出不但無罪而且有功從前莊錫舍投出立功即賞
給守備得邀頂帶之榮此乃衆所共知者如此詳悉

開導曉諭俾從賊百姓紛紛投出不但賊黨可以解散且使賊中頭目自相猜疑于剿捕實屬有益再現在常青等統領官兵攻剿賊匪糧餉火藥俱由內地陸續撥解將來添調各兵到後應需運往者更多此等糧餉軍火最關緊要著李侍堯於派員押解時務須加意慎重遴選妥幹之員小心押送並給兵丁防護倘於途次或有被賊邀截之事豈非資寇兵而齎盜糧此事所關非小著傳諭該督必當慎之又慎加

意辦理以期無悞要需

臣等謹案臺灣吏治廢弛不肖之員任意貪婪殃
民斂怨於結黨倡會鉅案並不嚴究痛懲以致奸宄
無所懾惕釀成叛逆奸謀及賊匪起事被戍若仍
得一體邀榮褒卹竟無殊於仗節抱忠實不足為
貪墨者戒我

皇上錄善必歸核實

特命督臣常青等嚴查其平日居官之政蹟兼叅以輿

論之品評以定予奪斯恩榮不得濫叨而彰善癉惡舉錯咸宜愈足以肅官方而勵人心矣

欽定平定臺灣紀畧卷二十二

欽定四庫全書

欽定平定臺灣紀畧卷二十三

六月二十五日

辛酉

藍元枚奏言彰化賊匪時刻窺

伺鹿仔港所有田中央南投庄大肚溪三處隘口

屯聚賊夥緊守大里杙賊巢皆築堤決水防備官

兵進剿而諸羅縣屬自五月初七日起陸續焚搶

沿海之安溪寮龍船窩鐵線橋等庄計二十餘里

以致諸羅彰化道路不能相通其近海民人因賊

焚庄多有搬家乘船逃到鹿仔港而鹿仔港居民
見賊蔓延未免惶惑致有殷寔店戶欲搬家口貨
物渡回泉州臣竊思若殷寔之人搬回內地則民
心愈虛隨即親到街市慰諭禁止令其各安生業
并飭護同知黃嘉訓彰化縣宋學灝稽查難民妥
為安撫內有勇壯者挑作義民給與口糧交義民
首管束在難民得有口糧之資兼可幫助官兵戰
守之用民情已漸安貼但鹿仔港週圍村庄現在

僅存二十餘里又迫近賊巢不得不加意防守已
經派撥官兵義民在番仔溝馬芝遴兩處險要安
設營盤增添堆卡防範已屬週密似可無虞又另
撥官兵義民往二林大突沿海一帶堵禦遙為諸
羅聲援查有彰化淡水交界之大甲溪岸裡社係
附近大里杙之北該處義民熟番頗知義理不肯
從賊經密差幹弁由海道往大甲曉諭義民鼓勵
番衆令其攻迫賊巢以分賊勢臣細察情形如果

聲勢得以聯絡便可率兵攻擊大里杙之南再淡水竹塹一帶據閩安協副將徐鼎士等稟報淡水白石湖賊本無多已經拏獲從賊之叅革守備彭喜一名解送督臣究辦現在賊匪勢孤逃入金包後山臣即飛飭該副將等速將逃散賊匪勦捕務盡根株再查鹿仔港難民雜處稽查尤宜嚴密以防賊匪潛入滋事是以差派弁兵四處偵緝適據弁兵拏到盜犯張湊劉楓經迫勒薛四銀兩并搶

奪牛隻又在路上截搶不識姓名婦人物件訊供
不諱雖非林爽文賊黨但當擾亂之際截途搶利
必須從嚴懲治俾衆人咸知儆畏當即將張湊劉
楓正法

同日李侍堯奏言笨港為諸羅通海要口自府城
海道北至鹿仔港必由笨港經過向來府城諸羅
鹿仔港陸路已不通惟恃沿海用小船往來今笨
港已失該處船隻必多為賊所得又將在海口攔

截滋擾則不惟府城鹿仔港信息益不能通而內地糧餉火藥等項由廈門解至府城由蚶江解至鹿仔港雖係橫海徑渡不從笨港口經過然賊或探伺駕船在海面邀截亦不可不防是以臣酌撥繒船二隻每隻安砲六位水師鎗兵一百名令營員帶往一駐鹿耳門口一駐鹿仔港口彈壓防護庶免踈失至從前原擬浙粵等兵一到臺郡即可席捲而北今常青甫經出城已為賊阻而水陸兩

路信息又且中斷則欲待常青由南而北正需時
日是目下只可南北各自為戰庶羣賊不至盡萃
于一處然臣閱藍元枚摺稿尚須待聯絡熟番始
行舉動伊雖未奏請添兵然至挑選難民協同守
禦亦似有賊多兵少之慮今常青方請添兵若又
須接濟藍元枚則需兵更多徵調更廣臣查漳州
鎮兵四千上年因林爽文黨羽皆係漳人故獨未
調撥若派往藍元枚處以漳人統漳兵或可得力

之處業經具奏仍一面札詢藍元枚如伊自量可
以帶領得用俟覆到日擬將此內選派有眷屬之
兵二千前往接濟再藍元枚投文兵丁王德到泉
詢以賊中情形據稱賊匪甚多兼有鎗砲臺灣亦
出硫磺賊匪在大里杙自行製造並不仰給外來
等語隨檢查臺灣府誌有硫磺山出產硫磺在淡
水廳北一百八十里焉知非賊匪即由該處私挖
製用副將徐鼎士現駐艋舺與硫磺山相近臣已

札藍元枚速飭該將前往察看如有賊匪私挖即行擒殺勿使透漏又鳳山縣有硫磺溪或係因該處產磺而名亦札會常青令其于南路進兵時一併體察防範

同日常青恒瑞同奏言賊匪等于六月初一日辰刻分四路前來臣等親臨行陣督率將弁兵丁向前施放鎗砲打死賊匪約三百餘人奪獲行營砲一尊賊匪狡詭異常正與官軍對壘之時又令黨

夥潛犯府城之小南門大北門二處其北門營盤
經副將丁朝雄知府楊廷樺等率領兵民各放鎗
砲將賊打退其南門桶盤棧營盤有賊二千餘人
直來攻撲臺灣道永福親督鄉勇分派義民隨同
升兵並遊擊左淵等各帶兵丁齊赴接應鎗砲打
死賊匪約數十人乘勢追趕又殺賊十餘人賊人
之受傷者更多即時奔散初二日臣等復派遣鎮
將等帶兵向前搜勦並先分路埋伏以備從旁截

殺賊等恃其人衆仍來抗拒官軍鼓勇前進施放
子母連環鎗砲又打死賊數十人賊即敗逃因中
路賊人決溪放水道路盡為泥濘即便收軍初三
日夜賊人又來偷劫營盤因派有弁兵各處預伏
一聞砲響賊遂驚逸初五日早探得賊目莊大田
現在南潭令其夥匪千餘人到府城大北門外十
五六里薦松等地方聚黨焚劫臣等帶同副將官
福派撥前隊兵一千名令副將蔡攀龍侍衛富克

旌額章京官寶等帶領並臺灣道府分派義民交
同知楊廷理親帶隨同前往又派撥二隊兵五百
名令總兵梁朝桂章京德成額他思哈等帶領又
令烏什哈達岱森寶等帶兵一千名在大北門外
沙嵌下預備截殺本日立時馳往行至蔦松一齊
向前奮擊賊人不及防備倉猝抵禦尚敢力戰官
軍鎗砲齊發打死賊約二百餘人義民等殺賊割
獻首級耳記髮辮生擒賊匪湯其曾表曾順謝佛

邵長等五名奪獲鎗刀旗箭等械又奪獲牛羊米
鹽地氈乾當將該犯交道府等訊明另辦其牛羊
鹽米地氈即分賞義民賊衆俱各逃竄我兵亦間有傷
亡者惟是賊匪雖衆如僅嘯聚一二處或與官軍對
面打仗自可剋期決勝今賊人自中路大武隴南
至鳳山一帶一百五六十里大小村庄皆被賊人
盤踞而現在相近軍營又令其匪夥分踞崙仔頂
南潭中洲蔦松等處其地勢路徑既係竹箐叢雜

又多曲折低窪若遣兵近迫則蜂擁竊發及結陣
遠攻又巧避潛藏是以賊人屢敗不退官兵未得
盡力窮追必須多用重兵自可盡殲醜類至臣等
現在駐營距府未遠聲息時通且相為犄角斷無
後顧之慮又從前鎮將等稟報攻克各縣除鳳山
復失外正月間柴大紀收復諸羅縣城復有義民
首武舉黃奠邦等協力堵禦是以城內居民得以
照舊安業賊雖屢犯俱被殺退陳邦光以署守備

防守鹿仔港汎地止有汎兵五十餘名其能攻克彰化擒拏賊犯係該處義民肯林湊等糾募多人始得協同集事緣義民等本住居鹿仔港不能在縣守城且公私積貯焚劫已空並無糧食可支亦非陳邦光一人所能守禦是以將受困官親及居民男婦同回鹿仔港保守是柴大紀陳邦光稟報攻復諸羅彰化尚非謊報冒功至副將徐鼎士現在淡水該處地方遼廓醜孽易聚其民人懇留彈

壓亦係實情謹據實覆奏至投誠之莊錫舍臣等
已給予守備職銜並酌請

賞戴藍翎其屬下人等又分別其出力之林福生等十
六名一概給予金頂伊等泥首叩謝情願報効此
時頑梗之徒聞風定知悔罪但莊錫舍從前雖有
二千餘人其中脅從者衆未必盡能臨陣自投順
之後有願歸肩挑負販之業者即仍聽其解散現
在尚能打仗並訪探賊情熟識路徑者共二百五

十餘人俱造冊另記給與口糧隨營聽用又臺灣
缺額兵現擬于義民中願充兵者募補惟前在鳳
山潰兵之未回者尚多俟事竣確查嚴辦現在府
城鹿仔港等處兵民復蒙于內地籌撥銀米並撥
運浙江江西二省倉儲源源接濟充裕有資均奏
入

上命軍機大臣傳諭常青李侍堯藍元枚曰彰化賊匪
將沿海各庄陸續焚搶以致諸羅彰化道路不能相

通則文報信息必致阻隔前次柴大紀與普吉保在埔心庄訂期進兵因諸羅有賊攻擾即帶兵回縣堵禦令賊匪又將道路梗阻必係賊人素恨柴大紀思欲併力攻圍柴大紀自前月二十八日具奏後至今總未據續奏朕心深為厯念著藍元枚務將該處梗阻道路之賊匪上緊設法打通並一得柴大紀如何堵禦剿殺之信迅速加緊馳奏至鹿仔港居民見賊蔓延致有殷寔店戶欲搬家口貨物渡回泉州藍元

枚一經聞信即親到街市慰諭禁止令其各安生業
以固民心所辦甚得竅要前經降旨令常青藍元枚
等就郡城鹿仔港一帶廣行招募即曾經被賊迫脅
附從者一經應募投到不妨即令食糧充伍今藍元
枚于未奉諭旨之先已將難民勇壯者挑作義民給
予口糧令其幫助官兵自屬得力即予錢糧入伍均
無不可並着常青于該處被難民人亦應一體挑募
給糧充伍于勦捕更為有益至大甲溪岸里社之義

民熟者不肯從賊現經藍元枚差弁曉諭令其攻迫賊巢分掣賊勢一俟聲勢聯絡藍元枚即率領官兵前赴大里杙之南相機攻勦所辦甚合機宜至彭喜一犯曾任守備乃竟敢從賊甚為可惡即着李侍堯于審訊後委員速解赴行在審究昨念及內地解往糧餉火藥等項關係緊要若被賊要截貽誤非小已諭令李侍堯務須遴委委員小心押解毋致稍有疎虞又鹿耳門及鹿仔港各口岸皆全臺要隘文報兵

糧往來梭織恐賊匪狡黠心生窺伺已于數日前降
旨令常青等酌派將備加意防守今李侍堯已能想
到及此撥兵分駐甚為妥善又硫磺山出產硫磺着
藍元枚即就近飭副將徐鼎士認真稽查如有賊匪
私挖等事即行擒殺勿使透漏前常青奏請添調官
兵早經降旨調撥現在賊匪雖四處蔓延但究係烏
合之衆並非皆能臨陣打仗之人其勢自易潰散昨
已降旨令常青藍元枚各在府城鹿仔港就近召募

現在各該處民人如何踴躍應募及賊匪有無投誠充伍之處着常青等即行具奏此次添調各兵前抵臺灣尚需時日常青等斷無株守坐待之理如遇有可進之機即應乘勢設法進剿以期集事看來常青處兵氣已為振作賊匪雖多業經連次剿殺紛紛潰散無難漸次殲除常青年逾七十親歷行陣督率侍衛章京將備併力向前人人用命朕心深為嘉獎着賞戴雙眼花翎叅贊藍元枚自抵鹿仔港以來一切

調度合宜打仗得勝伊係藍廷珍之子伊父從前勦
辦奸民朱一貴收復全臺奮勇克捷聲威久著今藍
元枚在鹿仔港統兵進勦能繼家聲實為可嘉亦著
賞戴雙眼花翎以示優眷臺灣道永福知府楊廷樺
率領義民打仗亦屬奮勉可嘉均着賞戴花翎該將
軍叅贊等務須督率文武各員倍加勉力奮勇進攻
以期搗穴擒渠膚功迅奏昨據孫士毅奏六月初九
日將預備在潮州兵二千名分隊起程此時已可抵

聞着李侍堯于兵到後即先行撥赴常青軍前應用其粵省續行調撥到綠營兵四千着李侍堯再將二千名令由蚶江配渡前赴鹿仔港接濟藍元枚至預備漳州兵昨據李侍堯奏到已諭令應行派往藍元枚處該兵丁既有眷屬可無他慮李侍堯即當派往原不必札詢藍元枚此旨到日藍元枚自早覆到此項兵丁想即派令起程前赴鹿仔港矣藍元枚處有此添調兵四千更為充足若往大里杙一帶進攻自

屬得力其餘添調滿漢各兵俱著隨到隨即派赴常
青處此內廣東浙江駐防滿兵更較綠營得力常青
得此多兵聲勢益壯又廣為招募賊勢日見解體自
可望剋期蕪事也至鳳山潰兵前據常青奏投回府
城有一千一百餘名續據柴大紀奏又稱有潰兵五
伯餘名已有旨許令戴罪圖功是前次鳳山兵丁潰
散已回者數目不甚相懸或柴大紀因勦賊事務煩
促未經咨會常青處該將軍止須于柴大紀處核對

即可得實在數目至臺灣百姓被賊侵擾焚燬村庄
耕種失業該將軍等于收復各路時務妥為安撫俾
得盡力補種各安本業既可免其失所更得多獲糧
食兩有裨益此為最要

二十六日

壬戌

上命軍機大臣傳諭常青李侍堯藍元枚曰常青等所
請添調各兵到彼尚需時日前經降旨諭該將軍等
再行抽撥兵丁數百名擇將備中可恃者飭令帶領在城

帮同防守常青等徑統領官兵舍南趨北會同藍元枚等打通斗六門一帶進逼大里杙賊巢使賊匪聞知驚惶進退無據以為出奇制勝之計常青等接奉前旨曾否即行派撥與藍元枚柴大紀等訂期前往倘因附近府城一帶賊匪四處屯聚不能分兵舍南就北朕意現在添調之兵業經李侍堯將預備兵二千先行配渡孫士毅預備兵二千又于六月初九日起程計此旨到彼此四千兵均可齊抵臺灣是常青

處又添生力兵四千聲勢日壯昨據常青等奏賊目
莊大田現在南潭又令其夥匪到府城北門外蔦松
地方聚黨焚劫而相近軍營賊人又分路崙仔頂中
洲等處潛藏竊發是郡城附近四面皆有賊匪潛聚
豈有不思先着待賊人來犯始行剿禦之理況臺灣
郡城于未添兵以前久已保護無虞今若再行抽兵
撥升添守自更可無慮該將軍等徑親帶侍衛章京
將弁直趨南潭將賊目莊大田屯聚賊匪悉力剿殺

若能將莊大田擒獲則其餘蟻聚夥匪自即望風而潰設各處夥匪前往南潭奔救更可乘勢聚而殲戮此亦出其不意攻堅擒渠之一策着常青等將是否可以如此辦理之處酌量情形迅速辦理一面具奏固不可冒昧輕進亦不當坐失事機也至李侍堯昨日奏稱笨港被賊佔據即撥緝船安放砲位令營員帶同水師鎗兵分駐鹿耳門鹿仔港等處此事最關緊要朕早經慮及已降旨諭令該督加意防範而

李侍堯一聞笨港有失即能慮及于此若能沿海一帶要隘保守無虞將來大功告成時此亦李侍堯之一功也現在海口有無阻滯之處並着李侍堯查明覆奏

臣等謹按臺灣逆匪滋擾官兵進剿止能于賊來堵禦從未乘勝長驅痛加殲戮故烏合之衆益肆無忌憚我

皇上前以常青等奏請添兵曾

諭以舍南趨北攻其不備實為出奇制勝之策茲復以賊目莊大田現在南潭即

命以防固府城率領將弁直趨南潭悉力勦捕擒其首惡分踞夥黨自必驚惶潰散扼要爭先計無逾此神鈴遠燭備示機宜么膺小醜何能久肆鴟張乎

七月初二日丁卯閔鶚元奏言前准何裕城咨查海運情形並無運米實在數目當將江西省由蘇分運之米計若干石及蘇省現辦海運情形飛咨何

裕城令其迅速咨覆以便預備旋據李世傑札會
江西省撥運閩米已酌令八萬石來上海過船起
運當即飛飭松太道並移會浙省一體加緊湊備
船隻應用奏入

上命軍機大臣傳諭何裕城閩鷄元曰江西運閩米石
何裕城自應查明陸運海運何路近便即令于何路
迅速運閩檢查舊案既有改由海運較為便捷之案
又何必待江南咨覆始行起撥又不將運米實在數

目咨明以致江南難以預備船隻何裕城於軍務要
需互相推諉殊屬非是著將此項米石究於何日運
至海口裝載起運之處據實覆奏

初三日

戊辰李世傑奏言前據何裕城咨稱江西省

現在碾米十萬石赴閩分作六起委員從建昌府
新城縣之五福地方陸行八十里即至閩省光澤
縣水口轉運前進又檢查舊卷有由長江載至江
南上海關口由海運閩之事應咨明江蘇省現在

海船是否充裕可以迅速載運等情臣查事關軍
糈至要總以迅速為主緣接到何裕城來咨之時
正值浙省運米赴閩海船不敷移咨撫臣閔鶚元
在上海口代雇運浙協濟而江蘇省亦奏請撥米
十萬石赴閩彼時上海口岸所到閩廣船隻甚少
現在江浙雇用已不無竭蹶若再添運江西米石
恐一時無船裝運未免求速反遲似不如全由新
城陸路運閩可以計日而到當即飛行咨覆旋准

何裕城來咨以新城至光澤陸路八十里山徑溪
河層層險阻過嶺過渡運送頗艱必須由海道分
運方克迅速隨飛行江蘇藩司會同松太道務將
閩廣船隻速行設法招徠多為預備聽候江西運
米到日即行過載開行不許稍有推諉耽延再查
江省協濟閩米十萬石現在頭運米五萬石於六
月二十五日起運二運米五萬石於六月二十九
日起運飛飭文武各運員等務即趕緊開駕前赴

閩省免收不許稍有遲悞奏入

上諭內閣曰李世傑素能辦事所奏原委始為詳晰是此事竟係何裕城辦理錯悞軍需米石關係緊要何裕城既查明改由海運較為便捷即一面將應用米石數目及開行日期飛咨李世傑等預備船隻一面將應運之米運至海口等候以便裝載開行並應以海口船隻倘屬短少或將江浙米石先行運送俟江西之米陸續運赴海口時再行接運之處一併咨明

庶李世傑等可以酌量籌辦乃徒事往返札商並不
詳晰咨會又不詳悉奏明是何裕城不但意存推諉
并不知事理輕重實屬糊塗著交部議處

上又命軍機大臣傳諭常青李侍堯藍元枚柴大紀曰
昨據福建委員解到廖東等四犯當經隔別嚴審連
清水認為賊目王周載測字曾經許封偽巡檢阮贊
亦供稱向開米店賊到店中搶劫時曾代為煮粥並
收受黑旗許封千總等供是其從賊尚為有據業將

該二犯先行正法至廖東胡蕃二犯一供係義民挾
嫌誣害一供係兵役誤拿均屬一面之辭殊難憑信
若此時即將該二犯一併辦理不足以服其心且從
前獲犯時柴大紀或因軍務惶惚未遑審訊而解到
常青李侍堯處何以亦未訊取確供從前該將軍等
所奏各摺內既未詳晰聲叙實亦無從指質得其真
情着該將軍等即將該二犯如何被拏如何供認並
將現在該犯等所供各情節確實嚴查據實覆奏再

前奏林興文手下並有蓄髮親丁千餘名今見廖東等頭髮甚長雖據供被拿時係在正二月之間為時已久未能剃髮所致但四五月之間亦不致髮長如許恐係狡飾是否從前被獲即係久已蓄養之髮著一併查明據實覆奏

初四日已常青恒瑞同奏言初八日卯刻驟雨如注有賊匪三千餘人三路直撲大營臣等令侍衛章京烏什哈達等八員分派將弁帶領官兵各奮

勇爭先冒雨逕戰鎗砲打死賊五六十人至己刻
雨止又有續到賊匪接應約五六千人併力來攻
官兵鼓勇迎殺賊猶抵死不退官兵等施放排鎗
乘勢壓下賊方退走奪獲行營砲一尊鎗刀等械
十餘件初十日賊人復來攻營又分賊二千餘人
攻小南門之桶盤棧臣等一面派撥在營將弁分
路截殺一面飛飭副將丁朝雄等齊赴桶盤棧堵
禦臺灣道永福同知楊廷理帶領義民隨後接應

兩處打仗鎗砲打死賊一百餘人奪獲賊械二十餘件至午刻賊俱敗退當查出力有功以及傷亡弁兵義民俱照例賞卹註冊再署遊擊黃鳴鳳在鹿耳門內外洋面巡緝初七日巡至卓加海面瞭見賊艘八隻隨率弁兵義民追擒賊船駛逃入港登岸奔逃立帶把總李光顯等追捕時有蕭壠等莊義民陳聰等率衆協同官兵殺賊二十二人其餘逃竄賊船賊寮盡行焚滅當將該將弁等記功

以待獎擢義民陳聰等各賞銀牌又查南北沿海各港小口俱可通運糧食如鳳山之東港已被賊人佔踞近復于諸羅之笨港鹽水港往來騷擾糧食不通郡城米價漸昂每石錢三千二三百文該道永福現在設法調劑且防範沿海洋面保守郡城臣等酌量各處分兵四五百名并義民數百名前往勦禦仍知會藍元枚會同柴大紀就近速派弁兵齊赴守禦務使港口常通則米糧不致騰貴

至賊夥雖衆臣等查看一有變動即乘勢疾擊亦不敢待添調之兵致失機宜

同日柴大紀奏言諸羅縣南大排竹地方有賊匪千餘復圖肆擾臣即于初十日黎明親率南澳遊擊李隆鎮標把總蔡國祥羅勇各官兵併署諸羅縣陳良翼帶同武舉黃真邦各義民等一齊馳至大排竹果見賊衆聚集山上臣即督令官兵義民奮勇上山圍拏連放鎗砲賊匪俱向山後奔逃官

兵義民復勇往追殺賊被鎗砲打死者約數十人
趕至窠仔厝賊皆四散遠竄值大雨收軍官兵義
民俱無損傷生擒賊匪鄭瑞王雕陳奇弁林潑鍾
攀石麟賴應林投廖明等九犯審明正法再恒瑞
藍元枚日內即可齊到兵力厚集尅期興師由南
而北併力勦捕自可一舉殲事均奏入

上命軍機大臣傳諭常青李侍堯藍元枚柴大紀曰閱
常青等奏到情形是伊等尚劄營駐守因賊匪乘雨

攻擾營盤督兵堵禦殺死賊匪僅一百餘人不及十分之一未能乘機進剿此次添調各兵計粵省先行調撥兵二千及李侍堯挑備兵二千此時均可前抵臺灣此外添調兵丁尚需時日常青等斷無坐待株守之理前曾諭令該將軍等統領侍衛章京將備徑往南潭擒拏賊首莊大田設餘賊奔救即可聚而殲戮該將軍是否即行派撥直趨南潭若察看情形可以如此辦理業已前往固屬甚善但賊匪出沒無定

甚為狡獪若因常青等統兵前往南潭賊匪即糾合
夥黨繞截後路亦不可不慮該將軍等務須加意防
範或派奮勉將弁斷後使我兵首尾相應不致被其
抄襲方好前據李侍堯奏諸羅笨港被賊焚燒已撥
派繒船分駐鹿耳門鹿仔港等處復有旨諭令常青
藍元枚於沿海一帶各隘口派員把守並將笨港等
處賊匪先速行勦除打通道路毋使賊匪得以乘間
滋擾今鹿耳門等處果有賊船騷擾之事自應嚴飭

官兵於各口岸梭織往來巡查防範毋致稍有疎虞
其遊擊黃鳴鳳巡緝認真即以叅將擢用至藍元枚
接奉前旨如何設法勦散分路防堵及前奏稱大甲
溪岸裡社有義民熟番不肯從賊業經密差幹弁曉
諭義民鼓勵番衆令其攻迫賊巢以分賊勢如果聲
勢得以聯絡即可率兵攻擊大里杙之南等語自屬
極好機會着一并迅速覆奏又賊匪攻擾諸羅動稱
千萬而官兵勦殺僅止數十人總未見大加勦洗其

餘匪是否屯聚各處或遁往山寮之處柴大紀均未
分晰奏及著柴大紀務將該處近日打仗攻勦並道
路是否不致梗阻各情形據實覆奏

欽定平定臺灣紀畧卷二十三